

古穰文集卷之十五

墓表

贈御用監太監阮公墓表

公姓阮諱浪世家交趾永樂中

太宗皇帝因安南作亂遣將征之衆悉歸附時公甫十餘歲特俊爽被選入掖庭

太宗見而奇之異成其才命讀書於內館公穎敏好學孜孜不倦遂博通群書頹頹儒者然德性博篤能以禮自持與物無競輩行莫不折已加敬焉用是

太宗命理尚衣監事公益敬謹小心克勤所事泊侍仁宗尤愛其才將有寵任之漸



宣宗初遂擢奉御俾掌寶鈔司時官軍直禁衛者宜置金牌特委公督治事不日而完宣德三年西洋諸國進御船抵廣南有司馳報
宣宗以為封堵寶物必得其人命公馳往處置周密而還
所歷秋毫無犯

宣宗甚喜賞賚殊厚五年

宣宗念醜虜弗率親帥六師出塞以振威武公扈征有功
陞御用監右監丞正統改元之初

今上以公為先朝舊臣多效勞勩特陞左少監侍

上十有五年恭慎不懈如一日及

上居南宮公復以老成端謹入侍左右事無大小悉咨委

之時景泰已易太子奸臣覲圖爵賞構辭加害言公欲糾
衆復立正統又欲公旁引內外勩舊羅織成狀百端摭掠
雖極其慘毒未肯承服遂忍恨而死終不累人聞者莫不
酸辛嗚呼公能之死不變以息內外勩舊之禍視古之剖
心明誣者亦何讓哉公生於洪武某年九月九日卒於景
泰三年七月十二日春秋若干今

皇上復位改元天順首誅奸惡而深悼公之誣枉特贈公
御用監太監賜以秘器如禮斂之復令所司擇地為營塚
壙遣官諭祭以安其靈公雖弗克享高爵於生前而所以
表公之節白公之心傷公之亡寵眷已極則公之死不
為徒死所謂有重於泰山者也司設監丞賈公安猶慮公

之行實未盡暴於世屬予為表刻石墓道以示不朽云

資善大夫吏部左侍郎俞公墓表

竊惟夫世之人見害必避見利必趨已而避害者得害趨利者失利大抵不知命者也若夫知命者遵道而行盡其在己人謂蹈害而利反至焉人謂失利而害莫侵焉豈非明哲之士哉今之士效用於世能若是者其惟俞公乎公諱山字積之別號梅莊先世居汴有仕宋者扈蹕南渡因占籍嘉興遂為秀水人高祖瑞卿曾祖禮之俱不仕祖伯綱父璿俱不幸坐累遷戍而死人咸惜之後以公貴俱累贈資善大夫太子少傅兼吏部左侍郎妣王氏鄉先生達道之女累封太夫人公生而岐嶷風骨秀爽志趣不凡達

道見而異之曰俞氏之昌其在茲乎遂妻以子弱冠補郡庠生治春秋從西園李先生講學專業不懈至忘寢食踰年即得其與義永樂癸卯領鄉薦以祖妣周氏垂老不忍去左右就養者三載宣德丁未乃入太學時祭酒四明陳先生師道尊嚴慎許可六館之士肅然惟待公以色庚戌春遂中乙榜人或諷之曰以子之才乃屑就邪公曰命也不可強遂得蘇之崑山訓導崑山之士樂公善教莫不爭先奮勵底于成俄丁外艱諸生攀留弗克有隨之抵家受業者正統丙辰服闋調常之宜興時公之執友楊氏適主師席遂同心率教士習丕變未幾丁祖母憂宜興之士思之不置爭詣提學御史留之弗果正統庚申服除赴京時

朝廷嚴勅吏部擇儒官以輔親藩人皆托故避之公曰自有定數吾何避為遂選擢 邨王府伴讀公既居是職若將終身日勤講說不少輟祿微數窘畧不芥意弟子從游者益衆慕求公之文者接踵於門正統己巳景泰即位進公鴻臚左寺丞時都御史楊善掌寺事雅重公薦陞左少卿踰月拜吏部右侍郎賜 誥命階嘉議大夫尋轉左侍郎壬申進兼太子少傅復賜 誥命階資善大夫久之忽嬰風疾 朝廷屢遣太醫往視後少愈景泰乙亥乃上疏乞骸骨不許且慰留之踰年請之益切人或以謂曰委任方隆疾以漸瘥何苦欲休公曰隆替相尋亦理之常吾非不戀明時揣分且休况以疾乎復上疏懇辭 朝廷重違其

意特允其請資與甚厚俾乘驛舟以歸別之日公卿大夫設祖帳都門外觀者如堵莫不嗟嘆曰于今復見古人矣既歸越數歲舊疾復作竟弗起公生于洪武己卯六月四日卒于天順改元十月九日享年五十有九卜塋嘉興永豐鄉之原所著梅莊集若干卷藏于家配沈氏累封夫人生男三長曰謨次曰誥工科給事中改判充之沂州次曰諫女一未笄而沒孫男三孫女二公為人敦厚簡靜於勢利澹如也在藩卽時嘗衍義經書纂成講章尤善諷諫屢有裨益及顯用之日持以正大守以清謹不市私息不取容悅人皆知為君子人也景泰初議 迎復之禮公奮然曰鑿輿回則人心安力贊其成言官有持正被嫉者公曲

為調護竟致顯用其佐銓衡也人才多所拔用未嘗自言
曰薦賢為國豈為私也噫公之行藏不避害不趨利已而
未嘗有害吉無不利者如此雖畱於壽而立心制行之高
俯仰無愧足以暴白於天下後世矣

通議大夫兵部右侍郎宋公墓表

有衰經而深墨其容者造予云自南京來泣且告曰孤之
父先生故人也屬纊時謂孤曰表吾墓者必屬先生孤敢
奉遺命以請予悲其意不忍辭按侍郎俞宗立狀公諱琰
字廷珪拙菴其別號也系出唐廣平文貞公之後世居邢
州之南和唐末有為浙之奉化令者因土著焉詩禮相承
歷宋元弗替曾祖起潛為元鄭山書院山長方國珎據四

明即歸隱祖允宜性勤學尤喜成才為塾以教鄉族子弟
有遺規焉父諱原亮人稱竹軒先生而祖與父俱以公貴
贈通議大夫兵部右侍郎祖妣蔣氏妣朱氏俱贈淑人公
生於洪武壬申二月二日自幼穎敏甫六歲讀書日記千
百言遂能吟詠得句甚奇鄉先達嘆異之永樂初為邑庠
生益肆其力淹貫經學旁通子史凡陰陽曆數卜筮相法
咸造其精字書道勁不下古人年十七遭母喪哀毀過禮
時弟琬甫四歲抱養惟勤不貽憂於父居鄉勇於行義時
疫大作姑家尤甚人皆遠避無至門者公曰若此噍類絕
矣患難不恤何以親為遂宿其家躬治湯藥以全活之卒
者出地塋之鄉閭為之感化永樂乙未乃登進士第選為

翰林庶吉士預脩性理大全書未幾

仁宗皇帝以太子監國南京選公隨侍既而

太宗皇帝知公之才復召還北京預脩永樂大典書成賜

白金文綺授中書舍人涖事翰林

仁宗嗣位之初特賜 勅命階徵仕郎

宣宗皇帝御極遷禮部儀制主事仍涖翰林事宣德庚戌

以親老懇陳歸省未閱月復遣使 召還正統改元

皇上嗣位特選公入史館纂脩

宣宗實錄未幾遭外艱痛踊幾絕四年秋服闋至京

上以公累朝舊臣轉吏部考功主事日侍 禁庭凡中貴

人幼而秀者屬公訓之公雖被 寵光達盛衰之理益畏

慎不安屢乞外補或曰如公遭遇千載一時搢紳所願不

可得者何乃自踈如此公曰以吾所見當如是古人固有

不俟終日者九年春遂遷河南布政司右叅政時汝陽不

雨禾將稿蝗復大出官民憂懼走報藩司公大驚曰尚可

緩乎即日往視之且自誦曰匹夫一念之誠尚能格天况

吾任承宣之職乃齋嚴致禱方畢民忽報云有鳥數千成

陣而下延頸長足名曰禿鶩啄蝗無遺已而飛去越明日

大雨官吏士民交相忻忭景泰四年冬以考績來京轉太

僕寺卿尋遷兵部右侍郎公益勵忠勤士林推重未幾賜

誥命進通議大夫天順改元

上念南京根本重地以公老成往涖部事越三月以疾卒

于官是年七月四日也壽六十有四配李氏前禮部尚書
兼左春坊大學士志剛之女先卒贈泚人繼室同邑竺氏
女封泚人亦先卒側室孫氏金氏生男二長曰旻次曰晏
女慈恩適王績餘早卒孫男二俱幼旻等將卜歸葬于嶺
山之陽公雅性不喜喧囂嘗扁退公之所曰靜齋書八詠
以自況時重公之文求者接踵所著拙菴集若干卷沒之
日有司奏報
上深悼之特遣官諭祭仍命工部為營塚壙嗚呼公之見
用于世慎終如始愛惜名節無纖毫之玷置之名卿才大
夫之列無愧焉是宜有永于後矣

奉直大夫尚寶司少卿袁公墓表

士生天地間有遭遇明時而不得見用於世者有見用於
世而不得見知於君者有見知於君而無才術以顯其名
者有名雖顯而不能保全始終福壽俱隆者今之君子燕
而有之者吾於尚寶袁公見之嗚呼休哉公諱忠徹別號
靜思前人世居南昌至七世祖子誠仕宋累官刑部尚書
南渡時扈蹕家於勤六世祖芳為吉州泰和令高祖鏞成
淳進士為宋死節曾祖澤民養道不仕祖士元為元翰林
國史院檢閱官父珙 國朝太常寺丞贈中順大夫太常
寺少卿母倪氏封恭人公自幼穎敏神氣異常讀書強記
童外時已能詩文凡名士鉅儒一見知為大器太常君精
於風鑒公得其傳

文廟在潛邸時聞太常君名以書幣名之公隨侍
文廟見公論相大喜賞賚甚厚尋許歸家未幾

高廟崩建文嗣位信任非人猜忌宗室

文廟不安因有靖難志召公問之對曰天命有在誰能禦
之奉命纂人象大成書以獻賚予有加壬午夏

文廟入正大統首遣使召公父子至官其父太常丞且曰
忠徹臨事有斷制所言多驗特授鴻臚序班賞賚殊厚公
入謝曰

陛下當畏天脩德偃武崇文率由舊章振肅綱紀擢節財
用明慎賞罰禮貌大臣黜陟臧否用臻太平之治並賜嘉
納尋知公在我籍即令兵部蠲之又嘗勉公進學公以務

冗對遂陞尚寶司丞且曰此職有暇可親詩書公退而感
激不怠庚申改中書舍人已丑春營北京公扈從既至日
與大議復遣中使召太常君至父子相隨出入 禁庭尋
密遣公乘傳看楚王子重瞳公還奏無他異庚寅春以公
父高年優賚遣還公扈從北征既還

上屏左右從容密問大臣優劣之狀武臣丘福未能張輔
李遠陳懋柳升薛祿文臣姚廣孝夏原吉蹇義金忠吳中
呂震李慶方賓公一一論斷以對

上曰卿所識鑒正合朕意是歲冬太常君卒賻葬加厚公
奔喪葬畢詔起復之癸巳春扈從至北京甲午春復扈從
丑刺乙未夏

上謂公曰東宮不聞教子對曰臣聞古者不親教子宜選文學老成之人以輔導之責其成遂選儒臣儀智陳山等日侍講讀丙申春秩滿復尚寶司丞特加賞賚戊戌春召公至便殿示以進陞之意公固辭以父未有贈官即日召吏部贈其父官賜 誥命公益感勵進相書機要丙子陞尚寶司少卿 恩典稠疊莫與為比壬寅春扈從北征公言利出東路

上不從洎還軍在東者果大獲復觀將兵者得利已而捷至每從征所言無不驗者

仁廟登極待之尤厚賜 誥命尋賜還家燎黃省視

宣廟嗣位召至京宣德改元丁內艱不獲奔喪詔以從子

代還襄事一日見

上容色曰宗室人有謀上之意七日内果有報漢王反狀者公扈從往征之既還受賚彌厚甲寅春得展祭之請乙

卯春

今上嗣位公入朝己未夏懇乞致政既得請南歸傾朝縉紳祖餞都門外公之術奇驗於

文廟者不能盡述若公效忠讜論則人不及知者甚多如終大孝之情而慎密機事論養賢之實而贍其取給乞賜孔氏玉軸之誥歷言遣使取寶之非議武職宜唯終喪諫服藥勿信方士如此之類皆有人所難者休官居闕二十餘年忽遭疾顧其子曰死生常理吾何憾惟信誠忠厚可

以立身汝宜勉之屏藥端坐而終公生于洪武丙辰十一月七日卒于天順戊寅三月三日壽八十有三娶邊氏累封宜人先公二年卒子男二長應麟早沒次應驤鴻臚寺序班女七長適泰寧侯子陳鏞次適都轉運鹽使金達次適光祿寺卿子并醴次適寧波衛指揮萬全次適行人司副金亮次適昌國衛指揮武銛次適王迥孫男女各二應驤將以某年某月某日與宜人合葬于前畧山之側前期奉狀以治命來請表其墓公為人慷慨有大志不隨流俗正論毅然不以利害少沮與人交洞見肺腑不立町畦見人患難惻然力援傾囊不惜理有不直者面折不少借其政政也聞 朝廷出令之善用人之當則躍然而喜有不

便於民者必憂形於色此其為人豈特風鑒一事可稱道哉所著鳳池吟葉符臺外集若干卷

贈嘉議大夫戶部右侍郎薛公墓表

有自無為來者曰薛氏之子傳父遠命曰先公行實願托執事之文以不朽予憐其用情不以辭按其僚友翁君世資狀公諱能字士能姓薛氏世家廬之無為州有仕元為鎮撫諱景仁公之曾祖也娶李氏有隱士諱舜卿公之祖也娶顧氏考諱祥有智勇知元祚將終必有真主者出歲乙未聞

太祖高皇帝龍飛淮甸慨然提戈集鄉兵歸附已而從征渡江屢獲奇功授水寨管軍鎮撫明年克臺城己亥攻安

慶洪武改元為漕運使轉輸軍餉進工部尚書出為北平
布政使後罷中書陞六部復召為尚書時公已成立隨侍
克盡孝教歲辛酉尚書以事下獄卒公之兄覲坐逮謫戍
廣東之海南公倉忙中獨承喪事奉尚書柩啓墳與母夫
人賀氏合塋都城之南既襄事扶携老稚跋涉萬里抵瓊
州備嘗艱苦不以為勞顧兄在尺籍乃經營家務以佐之
而脩德善行不以荒僻貧賤易其心嘗扁其齋居曰敬脩
以見志翰林學士解縉聞而嘉之為作記處他昆弟間友
愛篤至交賢士大夫久而益敬命諸子從事詩書嘗戒之
曰先君當擾攘之際奮自武功歷官中外活人甚衆而子
孫播遷海外庸知造物者非玉成邪汝輩勉之忽一疾不

起宣德丙午四月十七日也距生元至正庚子二月四日
享年六十有七瓊之儒輩私謚曰靖安處士卜塋于瓊以
子遠貴累贈嘉議大夫戶部右侍郎娶歐陽氏有泚行早
卒累贈泚人繼娶沈氏累封太泚人佐夫起家一力勤儉
既遠登進士第擢戶部主事歷郎中侍郎祿養之餘悉以
散之族衆遠數遣人迎養太泚人憚於跋涉第慰遠曰汝
雖不在膝下吾心安矣天順二年七月二十七日卒享年
八十有四生子男五長繼善次繼隆次繼常次繼昇俱早
卒次即遠女二長適汪鏞次適訓導唐虔孫男四太泚人
計聞于 朝遣官諭祭復勅有司為營塋事遠乞迎新柩
合塋故里復給之驛舟以行皆 特恩也系以辭曰前有

尚書後有侍郎公雖韜晦益振其光靖安之名嘉議之贈
公雖云亡孰掩其盛首丘之義子克成之我表其墓百世
之思

中憲大夫湖廣按察司副使彭公墓表

太常少卿兼翰林學士彭君時狀其妣父慎菴先生之行
以示賢曰先妣平生存心制行之高不可以無述真執事
為表刻諸墓以示我後人賢固辭弗獲則按狀而書之公
諱琬字毓敬其先鄱陽人宋哲宗時有諱忠忝者官於吉
之安福子孫因家焉代有顯宦若廉訪使仕益轉運使國
祥其表表者至諱六有為國子生未釋褐而宋亡遂隱不
仕子孫相戒終元之世無顯者公之高祖祥翁曾祖芳遠

祖古清父欽樂皆業儒欽樂用公貴累贈奉政大夫脩正
庶尹廣東按察司僉事母李氏累封太宜人生子六公行
三自幼卓秀受業於古廉退山先生蚤有時譽永樂甲午
首領鄉薦戊戌春登進士第觀政憲臺時營建京城大臣
以公才可集事奏委督起應天諸郡夫役有司服其廉令
出無敢後期者吏受賄者置于法夫道亡者當械公以誠
感之曰能自首者免於是首者十八九漂水有虞真者素
以財力自雄為梗公列其惡狀真計窮而出公曰爾所以
安於豐產者皆

君上之賜也獨不知報邪真叩首愧服自後無敢亡者明
年以山東夫役緩於運木復委公督之令甚嚴衆為公危

公如期而還時侍郎李友直統其事嘉公之能而延譽之
公之名益著明年冬以親民職重推公知政和縣御史李
宋時巡銀場懼公不容其家人奸利乃文致其罪謫待沛
中公處之泰然自得洪熙改元用薦者授臨清教諭乃作
新士習具有程法諸生莫不悅服感激奮勵多底成才公
在師席凡三典文衡揚文貞公高其學行薦陞翰林院編
脩公曰是職不易稱也益力學忘倦雖空匱不悔預脩五
倫書及

宣廟實錄同事者服其精勤正統改元 賜勅命進文林
郎時 朝廷留意人材乃簡儒臣學行淳正者十三人授
以憲職提督天下學校公與選中陞廣東按察司僉事既

任立教條嚴考課歲歷郡邑開導諸生凡黷舍廢缺者
增脩二十餘所書籍不備者成刻而傳之嶺南士風為之
丕變科目之盛幾於中州復兼督農桑黜陟官屬奉法不
撓人服其公 朝廷嘉之 賜誥命進奉政大夫脩正庶
尹尋陞山西按察司副使仍理學事景泰初憲提學啟任
湖廣奉 勅贊理廣西軍務公益孜孜盡職不憚勞涉未
幾引疾致仕太宜人猶在堂公得奉歡膝下巴而居喪營
葬一遵家禮履兄弟間尤篤於友愛恒欲相接怡怡如也
立義塾以訓子弟暇則徜徉山水間自謂無樂以易之如
是者五六年忽疾作不能言昇至正寢精神不亂意欲永
訣乃秉筆以書有曰內不見已外不見人又曰保躬全歸

始終不移書畢而逝天順戊寅六月二十七日也距生洪武辛未十一月十日享年六十有八配劉氏累封宜人先公卒側室周氏生子一人晉早卒女三人長適歐陽和次適管驥次適伍塘晉之卒也無後公命時之仲子願為之後孫女一卜塋于故里黃牛嶺之陽公為人剛毅嚴肅雖燕居無惰容然孝友忠厚出於天性接人意誠而禮至尤謹於奉祀先塋在四遠者歲躬展省平居言論一出於正義有不合雖小不為所當為者雖違俗忤物為之弗顧也性甘淡薄於書無所不讀為文雄贍追古作者所著有備忘錄慎菴等集若干卷藏于家嗚呼天下人物江右為盛而江右世家彭為盛彭之彥公為盛然則公之行願可使之泯泯無傳哉賢與時同官久知其博雅君子所狀必非過其實者故繁其詞而不殺云

贈文林郎江西道監察御史鄭君墓表

鄭氏在宋有名綺者浦江人事親至孝臨終誓子孫毋析產乾道中賜號冲素處士子孫世守其訓歷二百四十餘年宋元本朝皆旌其門子恨不識其子孫有為御史者謁于告曰佑義門之裔也先君棄世七年矣而墓未有表懼善行之泯焉無聞冀有以白之子嘗歆慕鄭氏以為有三代之遺風故不以辭按狀君諱沂字景元別號菊軒高祖季二仕元由省元為叅尉自浦江遷常山曾祖朝宗祖辰表皆含章弗耀父德傳以才行薦試事地官出使閩越有

能聲未樂以疾求退母程氏昆弟五人君行居四自幼穎敏能詩善書性極孝父在官隨侍不釋至七易寒暑備嘗艱辛而和豫之色不少替與昆弟處怡怡然永樂初家遭多事計資費不能支君忍貽親憂乃極力當之業以不墜嘗總理一區租稅曰吾聞仁人君子惟以濟利為心若掊刻浚削者為利己也不知害己隨之矣用是小民感悅相率無後期者至於絕沒田土歲久為豪奸據匿而糧賦累及小民君慨然白于有司用是免代輸之患後雖遇君之子弟不論疏戚禮意必勤念君之德故也族胤既蕃一門同居迨二千口藹然雍睦無梗訓者有家塾焉恒延師儒合親黨子弟教育之居當水陸之衝凡搢紳官僚經過者

必見之君亦款留竟日夕或辯論古今人物徵詞與旨多出人意毗陵吳公以都給事中出宰常山聞君名往造其廬與語大悅歸謂僚友曰吾於是邑得子羽焉欲以賢良應詔君以親老固辭乃止二親年偕八旬餘康強無恙君別構堂以奉之扁曰怡樂與昆弟子姪朝夕會於堂下捧觴為壽及親沒塋祭一遵朱氏禮復構堂扁曰永思以寓終慕之情尤好施予見貧乏者濟之患難者恤之孤寡無依者婚嫁之有弗協於家而忿爭者陳大義以感化之去家二里許有溪曰亭潭往來病涉多溺死君為置舟濟之里有王乙遭疫暴屍雖至親懼不敢近君為具棺瘞之凡所行之善多類此伯父景範以富室起實京師君嘗

往省焉及卒曰母苦其後也以子佑代時佑已從學日有造君諭之曰吾聞獨學無友則孤陋寡聞京師文物之淵藪汝往親之卒業焉佑承命而往景泰初遂登進士第擢監察御史君嘗以書勉其忠勤儉慎及佑使蜀便道歸省君曰汝承王命不可久於此吾雖老邁有諸子在無慮也歲甲戌二月八日一疾而逝距生洪武癸酉四月十五日享年六十有二卜葬于江陽奄山之陽天順丁丑以佑貴贈君如其官配王氏先公九年卒贈孺人子男五人長某次某次某某女一適某孫男七人孫女五人嗚呼鄭君力學好善不干仕祿孝友刑于家德惠及于人慶澤衍于後是豈愧于義門之佳子弟哉是為表

進賢縣學教諭張先生墓表

嗚呼先生棄世在景泰六年十二月十三日距天順三年則四星終矣子滿自上饒至京師謁賢泣且告曰先人屬續之際顧諸子曰李原德知我平生托其文以表吾墓足矣言畢而逝不肖奉先人遺命以來惟執事有以惠之昔賢方童牝時先生來主鄧庠師席至宣德元年春二月賢始為諸生是歲八月先生以大故去賢受業先生之門纔數月而誘引開導方殷自後粗有成立不至于棄才實先生啓之今先生遺命屬賢賢尚可辭按國子學正張淵狀先生諱受字應祥其先河南信陽人曾祖某元末游宦江西之饒州祖友諒因移家廣信之上饒遂土著焉父明道

不樂仕隱居靈溪母李氏洪武甲寅正月二十一日先生
生焉自幼穎悟迥出等夷時翰林王欽止師道尊嚴先生
往受學焉大肆其力於經史子籍乃入郡庠未幾以學成
貢入成均得友天下士子聞見益廣有聲播紳間永樂丁
亥召入 文淵閣與脩大典明年秋闈遂中高第又明年
春闈名在乙榜得晉州儒學訓導丁酉秋浙省禮聘校文
鄉闈尋以秩滿調鄧州先生曰晉庠之士非無成效者科
目中否則有命焉今以此為功吾可必哉益脩教條以盡
吾責而已庚子秋復校文於陝右宣德初丁內艱服闋除
深州秩滿調溫州十年校文於福建正統戊午校文於河
南凡四典文衡皆號得人秩滿考績應遷先生以老疾辭

弗允遂陞進賢縣學教諭又六載致仕時年七十有七先
生器宇魁梧襟懷洒落無斬絕崖岸之行接人和氣溢於
言面所至後學多造就如賢之踈鄙亦在門下而春坊庶
子周旋禮部侍郎章綸監察御史王福生輩皆其高第論
者以比安定然一官淹至三十年之久豈造物者有所乖
歟雖然使先生不一任而躋膺仕則人才出其門者未必
若是之盛由此觀之則先生顯晦自不可以尋常之見論
也先生壽八十有二配同邑徐氏早卒繼晉州劉氏亦卒
男曰真曰觀女適太學生宋福嘉者徐出也男曰滿女一
適羅瑛一適童瑛一適宋友俊者劉出也孫男曰琦曰瑾
曰珙曰顯曰璘曰瓏女六三在室曾孫男女十有四卒之

明年八月卜葬邑之雙峯山下是為表

古穰文集卷之十五

古穰文集卷之十六

墓表

通議大夫大理寺卿王公墓表

吾鄉之士顯達者甚衆求其志節介然而潔白自守始終不渝者大理寺卿王公其人也嗚呼公今逝矣年止四十有七可勝痛哉公諱宇字仲宏別號厚齋河南祥符人曾大父敦本隱居不仕大父友德父希哲俱以公貴贈通議大夫大理寺卿母丁氏封涖人公自幼穎秀異於群兒父母獨鍾愛之童州時從師受業日記萬言巡撫侍郎于謙一見之曰此遠大器也即遣為邑庠生正統戊午遂發解鄉闈明年登進士第擢南京戶部主事刻革宿弊廉能之

聲大振都憲周銓時總京儲篋視屬吏見公獨敬愛之三載以績最進階承德郎公益砥勵名節在郎署中特立獨行不顧流俗時郎佐秩滿例轉正郎吏部以公才能顯著薦陞江西撫州知府是郡地儉民夥素號難治公至以簡御煩闔郡翕然稱頌里有隱士吳與弼以道自高足迹不至城府公欲往造其廬與弼聞之即先詣府謁拜接談竟日乃嘆曰真明府也公益勞心民事凡漁利害民之弊悉罷之吏有奸黠者盜府金自若公廉得其狀置于法衆皆畏服以為神明撫民多商給縑之錢歲計累萬前守皆自取以為當然公曰可以勿取而取之是傷廉也悉以屬官郡治傍有穴地前守引水畜魚以自給公以土實之為倉

儲粟數萬石以濟飢民郡人題其壁有關節一毫無地入公廉兩字有天知之句遠邇傳誦宜黃多山虎為患公為文告神而驅之虎皆遁去金谿有聚衆暴掠者公曰此吾良民迫於飢餒故耳即開倉濟之衆皆感泣曰真吾父也即時散去藩臬書公績曰剴繁治劇才識有餘清白操持纖毫無玷都憲巡撫者上公治行於朝特賜誥命以旌異之進階中憲大夫天順改元

皇上復位首念方岳重臣為郡邑表率屬廷臣會薦公在首選遂陞山東右布政使時廷議山東累歲不登民皆流移必屬能者撫安之

上以璽書托公凡賑濟之策不遺餘力民賴全活者數十

萬人明年

上念宣府北邊重地宜得憲臣赴撫遂召公為都察院右副都御史以往公至訓練士卒堅完城堡凡募粟屯田邊備戎務一切便宜處之刻弊刈奸士卒感息而權貴則不悅矣賴

上知公為人譖毀不行未幾兼巡撫大同時石亨與其姪彪皆驟遷高爵恃寵自肆而大同乃舊鎮之地索取尤橫衆莫敢撓公獨上章劾之以為大蠹大奸莫甚於此乞置于法以消未形之患詞氣剴切聞者嘆服已而亨彪果以奸敗 朝廷益嘉公忠直庚辰丁內艱還家一年

上起復公至京將有南臺之命忽念大理卿缺員持天下

之平者無踰於公遂以命之累章懇乞終制弗獲在任惟以洗冤澤物為心清研獄狀務得其情不知案牘之勞形也癸未春進階通議大夫公質幹奇偉心性剛介慎廉隅重名節操履端方確乎不可拔事親盡孝處兄弟篤於友愛自奉甚薄雖居顯貴服食不異寒士視貨財如汗穢見不廉者若將浼已避而遠之卒之日囊篋罄然無以為斂上聞訃惻然傷悼曰可惜佳士遣官諭祭其家復令有司營塋事公平生耽嗜六籍博極群書為文章根理趣詩古淡春容有餘味所存庫齋葦藏于家公生於永樂丁酉五月四日卒于天順癸未七月十六日配段氏子男三長曰樟次早卒次尚幼女一早卒卜以是年某月某日歸葬於

先塋之西嗚呼公之志氣如鳳凰翔于千仞之上而潔白
之操方宋之趙清獻公亦可以無愧矣

亞中大夫陝西布政司右叅政李公墓表

公姓李氏諱源字士徵別號志雲唐宗室燉煌之後五季
時避亂徙家浙之寧海遠祖穆宋迪功郎五世祖洧孫宋
甲戌進士學者稱霽峰先生元黃文獻公歐陽文公皆出
其門霽峰生栗栗生炳炳生塾洪武初以通經分教華亭
陞鄞州同知公之祖也卒塋華亭子孫遂為松江人塾生
志剛永樂中禮部尚書兼左春坊大學士公之父也母孫
氏生公自幼穎敏為父母鍾愛稍長即能文永樂中領鄉
薦登甲辰進士時宗伯公以陳漢王叛繫獄聞而喜之作

書以戒公晨夕展誦必泣下嗚咽是年秋

仁廟嗣位釋宗伯公為通政尋出知興化府以優餘年公
得侍行奉親之暇不廢問學宗伯公卒于官喪塋盡禮宣
德庚戌服闋至京擢吏部驗封主事尋署員外郎滿考為
真正統甲子用薦陞浙江布政司左叅議人或不滿望者
公曰藩佐非輕在吾足矣是歲浙東旱公曰此非安寢時
也即出巡視災雨隨降民皆擁道惟呼自是方伯憲長莫
不加敬而巡撫大臣凡清軍提學勘治審獄諸務悉以屬
之公理斷各得其宜戊辰冬閩賊大起慶發諸郡乘勢亦
亂衆議推公往守金華公慨然當之至則獎勵兵民欲重
賞以鼓其勇為同事者所沮幾至敗事公又言 朝廷錢

穀所仰給者在此數郡今日之事誠不可緩使此賊如宋方臘也即日進軍克銅鼓巖據要地賊既失勢使人來覘公獲之斬以徇賊始懼以退諸郡賴之以安時朝廷命將出師總戎監軍知公之能以諸郡兵民數萬屬公統之公率其家人子弟悉出行陣曰吾門累世替綬叨竊國恩多矣圖報涓埃在此一舉凡十有七戰馘賊甚衆招輯流民數萬總戎上其功適公述職之際有譖於都憲者乃中以事罷還天順改元

皇上復位始白公寃復其官改陝西至即巡邊撫民仍理軍政時歲歉民飢邊餉缺供守臣上疏舉公董其事上可之進公右叅政公益盡心區畫期副委任巡歷郡邑

至秦州遇暴雨成疾而卒天順癸未四月二十七日也距生洪武辛巳正月十四日享年六十有三公為人和易謙恭篤於友道且好施予或遇婚喪不能舉者輒分財以贖給之不與物競方被譖家居惟課子孫讀書足迹不至城市賓友至輒具酒餞談終日無憾意及在任得疾嘆曰吾非不樂山林者第以荷

上擢用邊事方殷豈可遽言吾私竟至不起所著志雲集若干卷藏于家配盛氏封孺人側室尤氏劉氏子男五人長曰桓南京前軍都督府經歷次曰楷國子生次曰概次曰果次曰柰女四人長適監察御史張璠次適汀州知府陸澂之子數次適陝西副使姜濬之子泰次在室孫男六

人女四人楷等卜以某年某月某日歸葬某山之原乃以
狀來泣請表其墓嗚呼公子僚友也感傷故舊情不忍辭
乃拭淚而書之使後世有考焉

中憲大夫太僕寺少卿金公墓表

公諱弼字輔伯姓金氏世為江西新淦鉅族曾祖仲卿祖
守正臨江儒學訓導學者稱雪崖先生俱贈資善大夫太
子少保禮部尚書兼武英殿大學士伯父幼孜永樂中文
淵閣大學士歷洪熙宣德又以已所歷官推息三世卒贈
榮祿大夫少保謚文靖父幼孝贈中憲大夫太僕寺少卿
母劉氏贈恭人公自幼警敏不凡先生長者咸異之年十
六喪父知自力學與兄故兵科給事中昭伯並擅時名以

禮經魁鄉薦登宣德癸丑進士第正統改元擢中書舍人
秩滿以績最陞太僕寺丞天順改元進少卿累階中憲大
夫初公為中書舍人尚寶少卿袁中徹獨傲公公具言其
過遂置于理竟坐罷去兵部建議擇太學生善書者書武
臣誥已得請矣復有以歲月久近論之者公上疏以為若
是則不善書者亦得濫預 詔是其言為太僕丞時北虜
為患公建言選將練兵數事多采行之為少卿慨然以馬
政脩舉為已任屢奉 命督理虧耗者自衛使郡守而下
悉聽決無不畏法感德有順聖川者水草甘肥永樂中嘗
牧馬蕃息天順初屬公往視定築二城用養天閑之馬增
二驛於中道以便往來凡百利害悉條陳以 聞詔嘉納

之公每歲往理馬政不憚勞動壬午冬忽得寒疾猶強視
事癸未春疾甚還京遂不起實三月十五日也距生永樂
癸未閏十一月七日享年六十有一公孝友之行出於天
性痛父早世每遇時祭哀感不已嘗迎母於京邸就養務
得懽心拓地築室以居宗族弟姪作詩規戒子孫無不備
至在京師買棺助人不能葬者凡十數恆貧濟難恒恐不
及可謂君子人矣配孔氏累封恭人側室尚氏張氏楊氏
子男四人長弘經次弘倫早卒次弘紀郡庠生次哥尚幼
女四人長適廖方鼎次適訓導尹嗣禎次適刁石次適蕭
漢從孫榮將扶柩以歸卜塋于鄉某山之原以祭酒劉益
先生所為行狀也子與公為同年友故不忍辭而次
其事使刻諸墓上之石焉

遵化衛指揮僉事贈昭勇將軍馬公墓表

公諱鎖住其先居朔方元有天下都燕入居薊州遂為遵
化人曾祖馬馬仕元為中書左丞祖咨識蠻為達魯花赤
從祖禿忽赤為開府儀同三司太尉錄軍國重事父阿老
丁為明威將軍公性質英敏體貌魁竒自幼從事詩書尤
閑於兵法仕元為樞密院斷事暨我

太祖高皇帝定天下慨然歸附以武畧見用為兵士之長
屬籍振武衛洪武五年調興武才能日著時

上夜夢一人長身廣眉器宇宏偉侍衛左右周旋甚悉問
其姓名對曰鎖住馬明日即命羽林百戶潘雄宣訪於

衆乃得公曰鎖住馬者公之號也視其狀貌脫如夢中所見

上喜而異之特陞鳳陽中衛指揮僉事因號應夢將軍時十八年正月二十七日也未幾從師北征大寧遼東至金山復從征龍安一渡河一迷河追擊納哈出及平大寧和中俾守大寧前衛復征捕魚兒海子哈剌哈累立戰功賚與甚厚特賜誥命二十二年顧遵化為喜峯口要路逼近邊境以公熟知地勢遂調遵化衛復賜誥命公乃練士卒脩武備於龍山之南構屋數椽戎務之暇與親兵耆舊會聚為樂延章縫之士討論古今成敗得失人才賢否不以富貴驕人四方文人才士莫不聞風而至公益虛心

下問故其識見大過於人及

太宗文皇帝興靖難之師公首從之奮力鼓勇以自效遂死於敵

上深憫之錄其孫榮為指揮同知公生元至正辛卯七月

二十三日沒洪武己卯七月十四日得年四十有九配馮

氏贈涿人合葬龍山之南子男一曰祥與公同沒於陣孫

男一即榮也既受蔭敘正統己巳以才能進都指揮僉事

充右叅將協鎮薊州永平山海等處乃以公死國迄今六

十一年而墓未有表大懼功行莫白於世以鄉人崔富嘗

守吾鄧託請文於石辭弗獲為述其槩而系之辭曰有赫

前人勝國名臣歷世罕倫公也華胄匪襲其舊挺然獨秀

初以才雄精神上通擢任兵戎屢督戰騎轉守邊地益思盡瘁

皇起于藩公屬橐鞬卒喪其元有孫洵武克繩其祖作鎮東土龍山之陽刻此銘章百世之光

奉政大夫浙江按察司僉事彭君墓表

君子坐累既白而卒于以見天理之有在也向使未白而卒君子之心固無愧怍怨尤于其間而世之為善者怠矣安福彭君君子人也不幸坐累逮至京師所枉既白寢疾十日而卒天理於是乎不泯君諱貫字進唯一齋其別號也家居智溪其先出番陽曰忠恭仕宋為吉州判官因家於安福曾孫曰廉訪使仕益廉訪子曰轉運使國祥轉運

十世孫曰復安以同族曰伯樞者無後以其子同升繼之即君之父也以君貴贈刑部雲南司主事母郭氏贈安人君自幼秀爽不群父兄咸異之稍長篤志進學遂領鄉薦登正統丙辰進士明年冬擢刑部雲南司主事是司獄繫多滯君蒞任旬日剖決無留難每於燈下詳讞其室人曰勞心如是彼罪人者安知之君曰吾盡吾心耳有盜伐山陵樹君驗其去陵遠遂薄其罪有中官獲盜送鞠欲掠殺之君曰吾豈可殺人以媚人哉卒處以常典有夫婦犯法當俱死君憐其一子在抱出其婦凡斷獄平恕多類此尚書魏源深重之源去囚反獄金濂為尚書以為典獄者私弊所致委君整飭乃得贓狀者奏請戍邊自是防範始嚴

歲癸亥用濂薦陞浙江按察司僉事督理屯田君見餘田多荒由于粒之輸與正同乃奏請遞減餘丁民人之輸田遂不荒孔氏在衢者家廟如關里元賜田以供祭國初由偽姓罪累田盡入官君奏請復給嘉湖水災朝廷遣宮覆實君遍履視之計虧常賦數十萬君曰為民獲罪尚何恤邪獨具實以聞遂免徵尋丁外艱服除復任景泰庚午受勅命推恩及親時處州盜起御史李俊督兵挫其勢有嫉之者反誣奏之事下守臣都御史軒輓以君公直檄往廉之卒釋其誣復屬理軍政凡詭籍妄附者悉正之洎詔恤刑復委君案閱可矜疑者皆得不死所至興學校正風俗除奸弊民皆悅服按察使陳璇禮君獨異

由是同官多忌之或譖於都御史洪英乃求君與璇之瑕考奏左遷君不與辯力以疾辭還家浙人數百上疏乞留不獲璇既得辯英坐是被劾而去君居家怡然自得時徜徉山水間世事一不挂口天順己卯用子華貴復受命進奉政大夫脩正庶尹及卒于京師凡卿大夫士莫不悼惜咸往哭吊君平居孝友事父母慶昆季咸得其懽天資剛明而器度高邁臨事立決確然當理是非成敗常預料之後皆不爽尤善別人物高下暇則書史不釋手為文以辭達為主從學者甚衆卒年五十有三天順庚辰十二月十一日也配伍氏有淋德累封宜人子男四人長曰禔克家不仕次彥充禮部儀制司主事次華翰林院編脩俱

以進士發身次禮邑庠生女二長適劉某次適劉某俱名族也禔與華扶柩將歸塋于故里乃以君從子學士時之狀乞予為表刻石墓上予不獲辭乃述其槩而系之以辭且以為世之力善者勸辭曰安城之彭世遠而芳簪組相繼後先乎光有卓嗣人明時奮翮備績賢勞世豈多得樂天知命曾不尤人橫逆之至我心無嗔數之乘除乃豐厥後益振家聲自天之祐眷此善行匪溢其詞刻諸堅石終古不移

中議大夫黃州知府致仕滕君墓表

記曰親有善而弗知不明也知而弗傳不仁也况為人子者其孝在於顯親揚名者哉都察院左僉都御史滕昭痛親之俱逝手述其行乞予表其墓予哀其用情而不忍辭按狀滕君諱霄字九皋其先開封鉤州密縣人元季避兵徙南陽之汝州曾祖公甫祖貴父興俱潛德弗耀君自幼天資穎秀為州庠子弟員永樂初貢入太學久之擢禮部司務陞祠祭員外郎有精勤之譽歲丙申用薦陞湖廣黃州知府抵任以寬厚為政民有爭訟者諭之禮義興學鋤奸政聲翕然黃岡之民訴有虎害君為文告神虎即遠去宣德中行部至麻城有訴勾軍戎士為人殺死不白者君宿城隍廟廡之見一刺鼠走入寢處盤旋而去即使人追之至一池塘潛伏不見掘之得屍即戎士也因獲所謀殺者遂正其罪遠邇驚異郡之獄囚一訊而決未嘗久繫人

多德之九載秩滿黃民不忍釋去上章懇留 詔令復任
君益勞心撫字惟恐一民不得其所在黃凡十有八年而
廉潔之操如一日甲寅歲乃引年致政而歸閉門甘守淡
薄如未仕時正統改元三月三日以疾終于正寢距生吳
元年二月三日享年七十太恭人程氏克盡婦道隨行仕
途佐以勤儉君卒後家無儋石之儲太恭人孀居獨持門
戶凡百所需皆出勤儉之力有售書者過門輒脫簪珥易
之以授昭曰讀此可繼父志也昭甫成童遣為郡庠生遂
領鄉薦授監察御史乃迎太恭人就養京師每戒昭曰爾
父居官始終廉潔爾任憲臣尤當澣慎况吾平生不喜華
靡勿以我故而較豐約昭奉命惟謹天順己卯以昭貴乃

獲 勅封祿養方殷忽遘一疾惟顧謂昭曰汝能輸忠報
國不墜家聲吾瞑目矣言訖而逝癸未十一月二十三日
也距生洪武丁卯九月十七日享年七十有七滕君先配
李氏早卒贈恭人太恭人其次室也子男二人長曰振次
即昭孫女二人長適貢士郭昇次幼在室孫男五人昭扶
柩南歸卜以明年某月某日合葬杏園之南岡嗚呼滕君
夫婦善行豈不足以為邦人出仕者之所取法哉是為表

朝議大夫國子祭酒劉公墓表

高官大爵有才能者皆可為之而祭酒則不可為蓋必學
行老成足以為人取法者斯稱其任焉天順己卯祭酒缺
員朝士大夫中拔而用之非不近且便而必求於數千里

之遠外若劉公豈非學行老成者之難得乎予方哭公之
亡而公子溥請表其墓同年之好不可孤也按司業張業
狀公諱益字崇益別號覺菴先世安成人後徙吉水曾祖
某號章江祖某號村老俱隱德弗耀父宗平號拙菴四川
大寧儒學教諭為學士解縉所知薦脩永樂大典書成陞
翰林檢討母解氏即縉之從女弟生子三人公其仲也自
幼穎悟好學弱冠游邑庠從前司業曾暹受易經知州柯
暹來掌縣事見公勤力不怠獨加獎曰此必異日名士也
宣德壬子遂中鄉試第四人登癸丑進士第正統改元授
兵科給事中戊午弟觀復中鄉試第一人登己未進士第
兄弟同 朝士林榮之尋以山西久旱命公往祀河濱西

海之神祀罷大雨人以為至誠所感六年以績家賜 勅
命推恩及親乙丑持節冊封 周王有所贈遺悉卻之不
受既還聞母喪塋祭一遵古禮服闋改刑科給事中己巳
秋虜犯京師人心危懼公疏陳禦虜策 朝廷嘉之即命
公往募山東諸道民丁習武藝以備調遣人皆倚以為安
是歲冬以公勞績陞湖廣布政司左叅議時興師征苗山
川險阻所慮者督運軍餉同官難其行公曰地方失寧咎
可逃乎乃毅然當之襄事而還時御史出巡歸者必劾方
面之不職於公不惟無疵可摘且疏其為政寬猛適中得
民心

上特賜誥命以旌其能仍推恩及親天順己卯用大臣薦

召為國子祭酒公以師為司業弟子為祭酒不可欲固讓之至則遲已致仕矣公既蒞事乃申勅學規作興士類諸生翕然從之天順癸未十二月十有六日以疾卒距生洪武壬午三月二十九日享年六十有二配徐氏封恭人子男三曰澡早沒曰溥曰濬女一適周仁達孫男二曰機曰攬公偉貌備髯容止典雅望之可知為儒者師然篤於孝友性度寬和橫逆之來未嘗與較有加誣者亦不復辯待其自明人以是多之作文理為主辭意條暢尤好吟詠音律清淡亦工翰墨字畫道美求者接踵於門所著覺菴集若干卷藏于家卒之日

上嗟悼遣官諭祭公卿大夫咸吊哭之嗚呼公之儒行足見重於世有如此者予故次第其事而授溥使歸刻諸墓石以示後人

復齋焦先生墓表

翰林庶吉士焦芳持其祖之行實謁予告曰吾祖儒行可述非得重世之文第恐不白于世敢以鄉後學請于下執事者予憐其志而為之表云先生諱顯字宗仁復齋其別號也世家南陽之泌陽曾祖某仕元為萬戶抗志不合即棄官歸隱而終祖良輔父成俱樂志不仕母董氏有泚德先生自幼不凡穎敏端重為父母鍾愛出入携之口授古訓輒成誦稍長遣入邑庠為弟子員勵志讀書師友莫不許可時泌久乏科目咸屬先生適以內艱居家服制將闋

有司強起之不從永樂甲午遂登鄉科明年春闈中乙榜
有勸辭之者先生曰命也當順受之擢易州儒學訓導恒
以不任為懼雖東脩之禮不苟納邑之材士賴其啓迪率
多成人永樂甲辰秩滿以績宸選擢 韓王府教授輔導
宗藩其任益重先生亦竭心力不少怠久之曰人生貴適
意耳吾何戀戀於此遂上疏乞骸骨時宣德丁未先生年
纔四十有五人或以為太早先生曰早圖晚節古人所尚
竟得請以歸營別墅於泌城之西去家數弓許為屋若干
楹繚以周垣蔭以佳木園池蔬菓觸目成趣日與鄉之
舊幅巾藜杖徜徉容與於其間且曰向為儻來之物所絆
今始復吾此樂耳為人簡易寬厚初無町畦處父兄宗族

鄉黨間無不得其懽心見孫芳聰秀俾入邑庠曰是能繼
吾家聲者已而果領天順己卯鄉薦時先生年七十有九
喜曰老夫含笑入黃泉矣至八十有一乃卒天順辛巳三
月六日也配武氏繼吳氏俱先逝子男五人長宣次溫次
朗次舉次鑑孫男十一人曾孫男二人是月二十日與武
氏合墓于泌城西南先塋之傍系以辭曰泌之儒先不多
見也有美復齋焦之彥也粹行清文心罔銜也啓迪輔導
力不倦也晚節端歸適所頌也別墅徜徉名鞅之弗戀也
考祥視履闔邑之獨擅也昌厥後人不掩其善也我勒斯
銘永為鄉人勸也

長樂林表

吾族上世遠不可考其在宋有兄弟四十八人自後子孫
屢遭兵革不能自存於是棄家走四方各避害以全性命
而已 國朝洪武初惟先祖少保府君來守祖塋嗚呼以
四十八人之後無慮千百指豈料守祖塋者僅存一人吾
族之衰未有甚於此時者也已而先祖乃生三子子今孫
枝又漸盛焉賢竊官于 朝推恩三代曾祖祖父俱光祿
大夫柱國少保吏部尚書兼華蓋殿大學士妣皆一品夫
人蓋盛極而衰衰極而盛一理勢之自然耳雖然盛極而
衰之家不再盛者多矣吾族既衰而復盛得非前人積德
之厚歟譬之水焉淵之深者源必遠或暫阻焉終不害其
遠也譬之木焉根之固者發必茂或暫困焉終不害其茂

也吾祖之墓去鄧六十里號曰長樂林者自宋以來然也
吾髮未燥時每隨父兄往拜掃焉但見叢木脩竹也雲蔽
日中有數墳纍纍相向吾於斯時茫然不知本源之義也
洎為諸生讀書講道心始開明歲時拜掃之際方思先世
盛衰如此亦不慮及表而著之也未幾出仕于 朝三十
餘年思欲表之亦莫之就而且於勢有未便者今也始克
為之蓋其志之堅情之切思之久成之急有不可得已者
第恨為之已晚難免不孝之罪或曰昔歐陽公為瀧岡阡
表蓋卜葬其親已六十年矣且曰非敢緩也蓋有待也今
子葬其祖亦三十餘年而始為之抑豈非有待之云乎是
大不然吾於初時何恃而待但其為表乃在 息典極隆

之後亦若有待焉者蓋事之適契豈敢上擬先正哉嗚呼
後世子孫誦此刻文可不惕然懼其衰至而思有以繼其
盛乎欲繼其盛豈有他哉惟脩德行義而不虧焉可也噫
可不慎歟

古穰文集卷之十六